

**MEĐUNARODNA KONFERENCIJA "INTEGRALNI PRISTUP  
SOCIJALNOM UKLJUČENJU ROMA KROZ STAMBENO  
ZBRINJAVANJE I ZAPOŠLJAVANJE"**

17.-21.5.2015.godine

Pozdravni govor, 18.5.2015. godine, u Mostaru:

Poštovani g. Gradonačelnice, dame i gospodo, cijenjeni gosti

Dozvolite mi da vas pozdravim i zaželim dobrodošlicu u svoje ime i u ime Ministarstva za ljudska prava i izbjeglice BiH. Zahvaljujem se predstavnicima Grada Mostara i CARITAS-u Švicarske, koji su organizovali ovu današnju posjetu Mostaru, s ciljem da vidite jedan od boljih projekata stambenog zbrinjavanja Roma u Bosni i Hercegovini.

Bosna i Hercegovina intenzivno radi na izgradnji multietničke i demokratske države, uz poštovanje ljudskih prava svih građana i manjina, uključujući i Rome kao najbrojniju i najugroženiju nacionalnu manjinu. Iako smo s kašnjenjem pristupili Dekadi uključenja Roma 2005-2015. godina, tj. u septembru 2008. godine, uspjeli smo napraviti značajne rezultate u rješavanju problema Roma u oblastima stanovanja, zapošljavanja, zdravstvene zaštite i obrazovanja.

Želim istaknuti da je, na inicijativu Ministarstva za ljudska prava i izbjeglice, 2009. godine prvi put u državnom budžetu osigurano oko 3.000.000,00 KM za rješavanje problema Roma u oblasti stanovanja, zapošljavanja, zdravstvene zaštite za implementaciju Akcionog plana za rješavanje problema Roma u oblasti zapošljavanja, stambenog zbrinjavanja i zdravstvene zaštite. Ova praksa je nastavljena i u kasnijem periodu.

Međutim, bez obzira na pozitivne pomake i postignute rezultate, romska populacija u BiH i dalje prolazi kroz iste probleme i izazove socijalnog isključivanja i vidnog siromaštva.

Kao što vam je već poznato Bosna i Hercegovina je 01.07.2014. godine preuzela predsjedavanje Dekadom uključenja Roma 2005-2015. U toku predsjedavanja organizovali smo sjednicu Međunarodnog upravnog komiteta Dekade i dvije regionalne konferencije koje

su imale za cilj između ostalog da ukažu na problem ravnopravnosti Roma i Romkinja, kako u zemljama okruženja tako i u Bosni i Hercegovini.

Bosna i Hercegovina je opredijeljena da nastavi realizaciju svih planova i aktivnosti u cilju poboljšanja uslova života romske populacije i bržeg integrisanja u društvo, naročito žena. Činimo sve kako bismo postigli više rezultata u sklopu raspoloživih finansijskih sredstava.

Koristim ovu priliku da pozovem i sve lokalne vlasti, romske nevladine organizacije, kao i međunarodne organizacije i institucije da nam se pridruže u ostvarivanju ovih ciljeva, kao što su i do sada činili.

Danas ćemo moći da vidimo životne uslove romskih porodica prije izgradnje stambenih objekata i nakon dodjele novoizgrađenih socijalnih stambenih jedinica. Stambeno zbrinjavanje je prvi korak naprijed, kojeg treba da slijede rješenja za zapošljavanje, obrazovanje i zdravstvenu zaštitu.

Želim vam ugodan boravak u Mostaru.